



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

14.01.2021թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2020/280**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Պատվիրատու՝ ՀՀ ազգային անվտանգության ծառայություն
Մասնակից՝ «Էլմարկետ» ՍՊԸ

Գնման ընթացակարգի ծածկագիրը և առարկան՝
«ՀՀ ԱԱԾ-ՏՆՏՎ-ԷԱՃ-3/18-ԷԼԵԿՏՐՈՍԵԽՆԻԿԱ» ծածկագրով էլեկտրոնային
աճուրդ, ձմեռային արտահագուստի ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 15.12.2020թ.-ի թիվ 26/26-1/18725-2020 գրությամբ «Էլմարկետ»
ՍՊԸ-ին (այսուհետ նաև՝ Մասնակից) գնումների գործընթացին մասնակցելու իրավունք
չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը

ՀՀ ֆինանսների նախարարությունը, ՀՀ ազգային անվտանգության ծառայության (այսուհետ նաև՝ Պատվիրատու) 19.10.2018թ.-ի թիվ 20/643 գրության հիման վրա, 26.10.2018թ.-ին «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձի (Է. Սարգսյանի) 30.10.2018թ.-ի որոշմամբ գործը ընդունվել է վարույթ և տրվել թիվ ՍՑ-ԷՍ-2018/155 համարի ծածկագիրը: 02.11.2018թ.-ին, 13.11.2018թ.-ին, 23.11.2018թ.-ին և 27.11.2018թ.-ին նշանակվել են նիստեր:

26.11.2018թ.-ին «Էլմարկետ» ՍՊԸ-ն հայցադիմում է ներկայացրել Երևան քաղաքի ընդհանուր իրավասության դատարան (այսուհետ նաև՝ Դատարան) ընդդեմ ՀՀ ազգային անվտանգության ծառայության և ՀՀ գնումների հետ կապված բողոքներ քննող անձ՝ Էմիլ Սարգսյանի՝ 27.08.2018թ.-ի «ՀՀ ԱԱԾ-ՏՆՏՎ-ԷԱԾ-3/18-Էլեկտրատեխնիկա» ծածկագրով հայտարարված էլեկտրոնայի աճուրդն անվավեր ճանաչելու պահանջի մասին:

Դատարանի 27.11.2018թ.-ի թիվ ԵԴ/26584/02/18 որոշմամբ հայցադիմումն ընդունվել է վարույթ:

Միաժամանակ Դատարանի կողմից 27.11.2018թ.-ին կայացվել է հայցի ապահովման միջոց կիրառելու մասին որոշում, այն է՝ հայցի ապահովման նպատակով արգելվել է /կասեցվել է/ պատասխանողներից՝ ՀՀ գնումների հետ կապված բողոքներ քննող անձին, ՍՑ-ԷՍ-2018/155 ընթացակարգով հարուցված՝ «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով հարուցված գործը քննելը կամ քննությունը շարունակելը, մինչև վերջնական դատական ակտի կայացումը:

Բողոքներ քննող անձի (Է. Սարգսյանի) 27.11.2018թ.-ին կայացված թիվ ՍՑ-ԷՍ-2018/155 որոշմամբ ընթացակարգի քննությունը կասեցվել է՝ մինչև ԵԴ/26584/02/18 քաղաքացիական գործով վերջնական դատական ակտի կայացումը:

Դատարանի 10.02.2020թ.-ի թիվ ԵԴ/26584/02/18 որոշմամբ «Էլմարկետ» ՍՊԸ-ի հայցն ընդդեմ ՀՀ ազգային անվտանգության ծառայության և ՀՀ գնումների հետ կապված բողոքներ քննող անձ՝ Էմիլ Սարգսյանի՝ 27.08.2018 թվականի «ՀՀ ԱԱԾ-ՏՆՏՎ-ԷԱԾ-3/18-Էլեկտրատեխնիկա» ծածկագրով հայտարարված էլեկտրոնային աճուրդն անվավեր ճանաչելու պահանջի մասին, թողնվել է առանց քննության:

Մասնակցի կողմից 26.02.2020թ.-ին ներկայացվել է վերաքննիչ բողոք:

ՀՀ վերաքննիչ քաղաքացիական դատարանի կողմից 21.05.2020թ.-ին գործը ընդունվել է վարույթ, իսկ 10.07.2020թ.-ին կայացվել է վերաքննիչ բողոքը մերժելու մասին որոշում:

ՀՀ ֆինանսների նախարարությունը 15.12.2020թ.-ին «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին (Լ. Օհանյանին) գործը մակագրվել է 15.12.2020թ.-ին:

Բողոքներ քննող անձի 16.12.2020թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՅ-ԼՕ-2020/280 համարի ծածկագիրը:

24.12.2020թ.-ին և 14.01.2021թ.-ին նշանակվել և հրավիրվել են նիստեր:

Գործի քննությունն ավարտվել է 24.12.2020թ.-ին և Բողոքներ քննող անձի որոշման հրապարակման օր է նշանակվել 14.01.2021թ.-ին:

2. ՀՀ ազգային անվտանգության ծառայության ներկայացրած փաստերը և դիրքորոշումը.

ՀՀ ազգային անվտանգության ծառայությունը 19.10.2018թ.-ի թիվ 20/643 գրությամբ դիմել է ՀՀ ֆինանսների նախարարությանը և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացրել է «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍԵԽՆԻԿԱ» ծածկագրով հայտարարված գնման ընթացակարգի շրջանակներում «Էլմարկետ» ՍՊԸ-ի տվյալները՝ համապատասխան հիմքերով:

3. «Էլմարկետ» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 16.12.2020թ.-ին գրությամբ դիմել է «Էլմարկետ» ՍՊԸ-ին՝ հնարավորություն տալով ՀՀ ֆինանսների նախարարության կողմից 15.12.2020թ.-ի թիվ

26/26-1/18725-2020 գրությանը նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, չի ներկայացել հրավիրված նիստերին՝ ներկայացնելով նախաձեռնված ընթացակարգի վերաբերյալ գրավոր դիրքորոշում հետևյալ բովանդակությամբ.

«Մույնով հայտնում եմ, որ «ԷԼՄԱՐԿԵՏ» ՍՊԸ-ն առաջին անգամ աճուրդի /e-auction համակարգով/ մասնակցելով «N ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՍԵԽՆԻԿԱ-1» ծածկագրով մրցույթի ժամանակ, ամբողջ խմբաքանակի գնի փոխարեն նշել է միավորի գինը, քանի որ առկա է եղել ապակողմնորոշում: Դրանից մեկն այն է, որ e-auction համակարգը այնպես է մշակված, որ թյուրիմացության մեջ է գցում մասնակիցներին, քանի որ աճուրդի ժամանակ բացված պատուհանիկում հստակ չի նշվում, որ ամբողջ խմբաքանակի գինն է պահանջվում: Դրա հետևանքով, նույն մրցույթի ժամանակ ոչ միայն «ԷԼՄԱՐԿԵՏ» ՍՊԸ-ն է միավորի գին առաջարկել, այլ նաև մի քանի այլ կազմակերպություններ:

Սրտեղծված պայմաններում ավելի քան հստակ է, ինչը Դուք էլ կարող եք տեսնել, որ համակարգի ոչ ամբողջական և սպառիչ գրված կամ լրացված լինելն ինքնին հանգեցրել է բազմաթիվ ընկերությունների համար ոչ բարենպաստ հանգամանքի:

Կոնկրետ դեպքում սույն գործով առավել քան հստակ է, որ մեր ընկերությունը հայտնվել է թերի համակարգի կիրառելիության առջև, ուստի փվյալ դեպքում Բողոքներ քննող անձը պետք է ամբողջական և բազմակողմանի գնահատման առարկա դարձնի այս հանգամանքը:

Այսպիսով իրավացի չի լինի թյուրիմացության հետևանքով կազմակերպություններին զրկել պետական գնումներին մասնակցության իրավունքից, այն էլ երկու փարով, հաշվի առնելով նաև այն հանգամանքը, որ «Էլմարկետ» ՍՊԸ-ն բազմաթիվ անգամներ բարեխղճորեն մասնակցում է պետական գնումների գործընթացին և պատվով կատարում պայմանագրով ստանձնած իր բոլոր պարտականությունները, ապահովելով աշխատատեղեր:

Ուստի խնդրում եմ Ձեզ փրված լիազորությունների սահմաններում հնարավորինս բարեխղճորեն վարվել սրտեղծված իրակիճակի հանդեպ:

Միաժամանակ հուսով եմք, որ օրենքի ներքոգրյալ դրույթը այս դեպքում կկիրառվի: «Գնումների մասին» ՀՀ օրենքի 47-րդ հոդվածի 2-րդ մասի համաձայն՝Գնումների հետ

կապված բողոքներ քննող անձն անշահախնդիր և անկախ քննություն իրականացնող մարմին է, որը շահագրգռված չէ կոնկրետ գնումների գործընթացի արդյունքներով և իր պարտականությունների ու իրավունքների կատարման ժամանակ պաշտպանված է արտաքին ազդեցություններից: Գնումների հետ կապված բողոքներ քննող անձը բողոքներն ուսումնասիրում է պարզաճ մանրամասնությամբ և անաչառորեն: Գնումների հետ կապված բողոքներ քննող անձը սույն օրենքով նախատեսված լիազորություններն իրականացնելիս անկախ է գնման գործընթացի մասնակիցներից, այդ թվում՝ պարզվիրատուներից, ինչպես նաև պետական և տեղական ինքնակառավարման մարմիններից ու պաշտոնյաներից և պարտավոր է ղեկավարվել բացառապես գնումների մասին Հայաստանի Հանրապետության օրենսդրությամբ և կիրառել այն:»:

4. US-LO-2020/280 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ ազգային անվտանգության ծառայության (այսուհետ նաև՝ Պատվիրատու) կողմից ձեռնային արտահագուստի ձեռքբերման նպատակով 20.08.2018թ.-ին հայտարարվել է «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐԱՏԵԽՆԻԿԱ» ծածկագրով էլեկտրոնային աճուրդ (այսուհետ նաև՝ Ընթացակարգ), որին մասնակցելու նպատակով հայտ է ներկայացրել նաև «Էլմարկետ» ՍՊԸ-ն:

ii. «Էլմարկետ» ՍՊԸ-ն մասնակցության հայտի թիվ 1 հավելվածով՝ էլեկտրոնային աճուրդին մասնակցելու դիմում-հայտարարությամբ, հայտարարել և հավաստել է, որ բավարարում է «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐԱՏԵԽՆԻԿԱ» ծածկագրով գնման ընթացակարգի հրավերով սահմանված մասնակցության իրավունքի և որակավորման չափանիշների պահանջներին ու հրավերի պահանջներին ամապատասխան ներկայացնում է հայտ:

iii. Ընթացակարգի գնահատող հանձնաժողովի (այսուհետ նաև՝ Հանձնաժողով) 31.08.2018թ.-ի նիստի թիվ 2 արձանագրության համաձայն՝ Հանձնաժողովը որոշել է 1-ին, 5-րդ, 7-րդ և 8-րդ չափաբաժինների մասով առաջին տեղ զբաղեցրած մասնակից ճանաչել «Էլմարկետ» ՍՊԸ-ին:

iv. Հանձնաժողովի 10.09.2018թ.-ի նիստի թիվ 3 արձանագրության համաձայն՝ հիմք ընդունելով առաջին տեղ զբաղեցրած մասնակիցների՝ «Էլմարկետ» ՍՊԸ-ի կողմից ներկայացված գնման ընթացակարգի հրավերով պահանջվող որակավորման պահանջներին իր համապատասխանությունը հիմնավորող փաստաթղթերը, գնման առարկայի տեխնիկական բնութագրերը, Հանձնաժողովը որոշել է 1-ին, 5-րդ, 7-րդ և 8-րդ չափաբաժինների մասով հաղթող մասնակից ճանաչել «Էլմարկետ» ՍՊԸ-ին և վերջինիս հետ կնքել պայմանագիր:

v. 10.09.2018թ.-ին պայմանագիր կնքելու նպատակով գնումների պաշտոնական տեղեկագրում www.gnumner.am կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և սահմանվել է անգործության ժամկետ՝ 10 օրացուցային օր (11.09.2018թ.-20.09.2018թ. ներառյալ):

vi. Պատվիրատուն, Մասնակցին ներկայացնելով «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ» ծածկագրով պայմանագրի նախագիծը՝ խնդրել է պայմանագրի նախագիծը ստանալուց հետո՝ 10 աշխատանքային օրվա ընթացքում ստորագրել այն և կից գրությամբ՝ պայմանագրի ապահովման հետ միասին ներկայացնել ՀՀ ազգային անվտանգության ծառայություն:

vii. Մասնակիցը 09.10.2018թ.-ին դիմել է Պատվիրատուին հայտնելով հետևյալը.

«Տեղեկացնում եմ Ձեզ, որ «Էլմարկետ» ՍՊԸ-ն չի կարող կնքել «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ-1» պայմանագիրը, քանի որ «Էլմարկետ» ՍՊԸ-ն մասնակցելով աճուրդի /e-auction համակարգով/ առաջին անգամ, սխալմամբ ամբողջ խմբաքանակի գնի փոխարեն նշել է միավորի գինը: Նշեմ որ, պատճառներից մեկը նաև այն է, որ e-auction համակարգը այնպես է մշակված, որ թյուրիմացության մեջ է գցում մասնակիցներին, թանի որ աճուրդի ժամանակ բացված պատուհանիկում հստակ չի նշվում, որ ամբողջ խմբաքանակի գինն է պահանջվում: Դրա հետևանքով, նույն մրցույթի ժամանակ ոչ միայն «Էլմարկետ» ՍՊԸ-ն է միավորի գին առաջարկել, այլ նաև մի քանի այլ կազմակերպություններ: Այսպիսով իրավացի չի լինի թյուրիմացության հետևանքով կազմակերպություններին զրկել պետական գնումներին մասնակցության իրավունքից, այլն էլ երկու տարով: Ուստի խնդրում եմ Ձեզ տրված լիազորությունների սահմաններում հնարավորինս բարեխղճորեն վարվել սրեղծված իրավիճակի հանդեպ:»:

viii. Հանձնաժողովի 19.11.2018թ.-ի նիստի թիվ 4 արձանագրության համաձայն՝ հիմք ընդունելով Մասնակցին 26.09.2018թ.-ին պայմանագիր կնքելու և պայմանագրի ապահովում ներկայացնելու մասին ծանուցումը ու «Էլմարկետ» ՍՊԸ-ի կողմից

ներկայացված գրությունը, Հանձնաժողովը որոշել է Մասնակցի հայտը մերժել՝ օրենքով սահմանված կարգով և ժամկետներում պայմանագիր չկնքելու, ինչպես նաև պայմանագրի ապահովում չներկայացնելու պատճառով:

5. **Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 15.12.2020թ.-ի թիվ 26/26-1/18725-2020 գրությամբ «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի համաձայն ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե որպես ընտրված մասնակից հրաժարվել է պայմանագիր կնքելուց:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ.-ի թիվ 526-Ն որոշմամբ (08.02.2018թ.-ի թիվ 104-Ն փոփոխություններով) հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 13-րդ ենթակետի համաձայն՝ ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում

պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը:

Նույն կետի 14-րդ ենթակետի համաձայն՝ ընտրված ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խորհրդին: Սույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում սույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը: Լրացուցիչ տեղեկատվությունը ներկայացվում է ինչպես առաջին տեղը զբաղեցրած մասնակցի կողմից՝ կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ: Ընդ որում, գնահատող հանձնաժողովի կամ քարտուղարի կողմից կոմիտեին կրկնակի հարցում չի կատարվում:

Կարգի 50-րդ կետի համաձայն՝ Ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից սույն կարգի 43-րդ կետի 4-րդ ենթակետի համաձայն ներկայացված առաջարկի:

Վերոնշյալ դրույթների համակարգված վերլուծության արդյունքում, Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում

պատվիրատուին ներկայացնել իր կողմից հաստատված պայմանագրի նախագիծը և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում պայմանագրի ապահովում, ապա վերջինս գրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի դրույթների կիրառման անխուսափելիությունը, քանի որ վերջինիս գործողությունները (անգործությունը) գնահատվում են որպես պայմանագիր կնքելուց հաղթող մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում երկու տարի ժամկետով, քանի որ պատվիրատուին չներկայացնելով պայմանագրի օրինակը և/կամ ապահովումը գրկվել է պայմանագիր կնքելու իրավունքից:

ՀՀ ազգային անվտանգության ծառայության կողմից ձմեռային արտահագուստի ձեռքբերման նպատակով 20.08.2018թ.-ին հայտարարված «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ» ծածկագրով էլեկտրոնային աճուրդ հրավերի (այսուհետ նաև՝ Հրավեր) 4-րդ կետի 4.3-րդ ենթակետի 2-րդ պարբերության համաձայն՝ մասնակիցը գնային առաջարկը ներկայացնում է համակարգի միջոցով:

Հրավերի 5-րդ կետի 5.2-րդ ենթակետի համաձայն՝ մասնակիցը գնային առաջարկը ներկայացնում է պայմանագրի կատարման համար առաջարկվող ընդհանուր գնով՝ արժեք (ինքնարժեքի և կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից բաղկացած հաշվարկի ձևով: Արժեքի բաղադրիչների հաշվարկ՝ բացվածք կամ այլ մանրամասներ չեն պահանջվում և ներկայացվում:

Հրավերի 7-րդ կետի 7.4-րդ ենթակետի համաձայն՝ աճուրդի ընթացքում ըստ չափաբաժինների կատարվող յուրաքանչյուր քայլի արդյունքում նվազեցվող գումարը չպետք է պակաս լինի աճուրդն սկսելու պահին այդ չափաբաժնի մասով ներկայացված նվազագույն գնային առաջարկի մեկ տոկոսից: Ընդ որում նվազեցվող գնային առաջարկները ներկայացվում են պայմանագրի կատարման համար առաջարկվող ընդհանուր գնով:

Սույն գործի փաստերի հիման վրա՝ Բողոքներ քննող անձն արձանագրում է, որ ՀՀ ազգային անվտանգության ծառայության կողմից ձմեռային արտահագուստի ձեռքբերման

նպատակով 20.08.2018թ.-ին հայտարարված «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ» ծածկագրով էլեկտրոնային աճուրդին մասնակցելու նպատակով հայտ ներկայացրած «Էլմարկետ» ՍՊԸ-ն Հանձնաժողովի 31.08.2018թ.-ի նիստի թիվ 2 արձանագրության համաձայն՝ 1-ին, 5-րդ, 7-րդ և 8-րդ չափաբաժինների մասով ճանաչվել է առաջին տեղ զբաղեցրած մասնակից: Հանձնաժողովի 10.09.2018թ.-ի նիստի թիվ 3 արձանագրության համաձայն՝ հիմք ընդունելով առաջին տեղ զբաղեցրած մասնակիցների՝ «Էլմարկետ» ՍՊԸ-ի կողմից ներկայացված գնման ընթացակարգի հրավերով պահանջվող որակավորման պահանջներին իր համապատասխանությունը հիմնավորող փաստաթղթերը, գնման առարկայի տեխնիկական բնութագրերը, որոշում է կայացվել 1-ին, 5-րդ, 7-րդ և 8-րդ չափաբաժինների մասով հաղթող մասնակից ճանաչել «Էլմարկետ» ՍՊԸ-ին և «Գնումների մասին» ՀՀ օրենքի համաձայնվերջինիս հետ կնքել պայմանագիր, ինչով պայմանավորված 10.09.2018թ.-ին պայմանագիր կնքելու նպատակով գնումների պաշտոնական տեղեկագրում՝ www.gnumner.am կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն և սահմանվել է անգործության ժամկետ՝ 10 օրացուցային օր (11.09.2018թ.-20.09.2018թ. ներառյալ):

Պատվիրատուն, Մասնակցին ներկայացնելով «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ» ծածկագրով պայմանագրի նախագիծը, խնդրել է պայմանագրի նախագիծը ստանալուց հետո՝ 10 աշխատանքային օրվա ընթացքում ստորագրել այն և կից գրությամբ՝ պայմանագրի ապահովման հետ միասին ներկայացնել ՀՀ ազգային անվտանգության ծառայություն, ինչին ի պատասխան Մասնակիցը 09.10.2018թ.-ին դիմել է Պատվիրատուին և հայտնել, որ չի կարող կնքել «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍՏԵԽՆԻԿԱ-1» պայմանագիրը, քանի որ «Էլմարկետ» ՍՊԸ-ն մասնակցելով աճուրդի /e-auction համակարգով/ առաջին անգամ, սխալմամբ ամբողջ խմբաքանակի գնի փոխարեն նշել է միավորի գինը:

Հանձնաժողովի 19.11.2018թ.-ի նիստի թիվ 4 արձանագրության համաձայն՝ հիմք ընդունելով Մասնակցին 26.09.2018թ.-ին պայմանագիր կնքելու և պայմանագրի ապահովում ներկայացնելու մասին ծանուցումը ու «Էլմարկետ» ՍՊԸ-ի կողմից ներկայացված գրությունը, Հանձնաժողովը որոշել է Մասնակցի հայտը մերժել՝ օրենքով սահմանված կարգով և ժամկետներում պայմանագիր չկնքելու, ինչպես նաև պայմանագրի ապահովում չներկայացնելու պատճառով:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը

ներկայացնելու օրվա գրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա, Բողոքներ քննող անձն եզրահանգում է, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Անդրադառնալով Մասնակցի կողմից դիրքորոշմամբ ներկայացված այն պնդմանը, որ «Էլմարկետ» ՍՊԸ-ն առաջին անգամ մասնակցելով էլեկտրոնային աճուրդի՝ e-auction համակարգի միջոցով, թիվ «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐԱՏԵԽՆԻԿԱ-1» ծածկագրով մրցույթի արդյունքում ամբողջ խմբաքանակի գնի փոխարեն նշել է միավորի գինը, քանի որ առկա է եղել ապակողմնորոշում և դրանից մեկն այն է, որ e-auction համակարգը այնպես է մշակված, որ թյուրիմացության մեջ է զցում մասնակիցներին, ապա Բողոքներ քննող անձն արձանագրում է, որ ՀՀ ազգային անվտանգության ծառայության կողմից ձեռնային արտահագուստի ձեռքբերման նպատակով 20.08.2018թ.-ին հայտարարված «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐԱՏԵԽՆԻԿԱ» ծածկագրով էլեկտրոնային աճուրդի հրավերով սահմանված է, որ մասնակիցը գնային առաջարկը ներկայացնում է համակարգի միջոցով՝ պայմանագրի կատարման համար առաջարկվող ընդհանուր գնով՝ արժեք (ինքնարժեքի և

կանխատեսվող շահույթի հանրագումարը) և ավելացված արժեքի հարկ ընդհանրական բաղադրիչներից բաղկացած հաշվարկի ձևով: Աճուրդի ընթացքում ըստ չափաբաժինների կատարվող յուրաքանչյուր քայլի արդյունքում նվազեցվող գումարը չպետք է պակաս լինի աճուրդն սկսելու պահին այդ չափաբաժնի մասով ներկայացված նվազագույն գնային առաջարկի մեկ տոկոսից: Ընդ որում նվազեցվող գնային առաջարկները ներկայացվում են պայմանագրի կատարման համար առաջարկվող ընդհանուր գնով:

Վերոնշյալով պայմանավորված՝ բողոքներ քննող անձը փաստում է, որ Մասնակիցը նախքան էլեկտրոնային աճուրդին մասնակցելը պետք է ծանոթանար Աճուրդի հրավերով սահմանված պայմաններին: Պայմաններին ծանոթանալու արդյունքում պարզ կլիներ, որ մասնակիցը գնային առաջարկը ներկայացնում է պայմանագրի կատարման համար առաջարկվող ընդհանուր գնով, որպիսի պայմաններում Մասնակցի մոտ որևէ ապակողմնորոշում կամ թյուրիմացություն չէր առաջանա e-auction համակարգի միջոցով գնային առաջարկ ներկայացնելու համար:

Բողոքներ քննող անձն արձանագրում է նաև, որ «ՀՀ ԱԱԾ-ՏՆՏՎ-ԷԱԾ-3/18-ԷԼԵԿՏՐՈՍԵԽՆԻԿԱ» ծածկագրով էլեկտրոնային աճուրդի շրջանակներում ՀՀ Ֆինանսների նախարարությունը նույնաբովանդակ խնդրի կապակցությամբ 03.10.2018թ.-ի թիվ 01.1/26-1/7883-18 գրությամբ հայտնել է իր դիրքորոշումը, մասնավորապես նշվել է, որ էլեկտրոնային աճուրդով իրականացվող գնման գործընթացներին մասնակցության հետ կապված պայմանները սահմանվում են հրավերներով և մասնակիցն ինքն է ապահովում դրանց համապատասխան գործողությունների իրականացումը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Էլմարկետ» ՍՊԸ-ն, որպես ընտրված /հաղթող/ մասնակից, հրավերով սահմանված կարգով և ժամկետներում չներկայացնելով պայմանագիրը և պայմանագրի կատարման ապահովումները, հրաժարվել է պայմանագիր կնքելուց:

Ուստի, հիմք ընդունելով «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի դրույթները, Մասնակցին պետք է ընդգրկել գնումների գործընթացին մասնակցելու իրավունք չունեցող մասնակիցների ցուցակում 2 (երկու) տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով ՀՀ գնումների հետ կապված բողոքներ քննող անձը.

Ո Ր Ո Շ Ե Ց

1. ՀՀ ֆինանսների նախարարության կողմից 15.12.2020թ.-ի թիվ 26/26-1/18725-2020 գրությամբ «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2020/280 ծածկագրով ընթացակարգը բավարարել:

2. «Էլմարկետ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ**



ԼԵՎՈՆ ՕՎԱՆՅԱՆ